

喙

鳴

文

集

喙鳴文集卷五目錄

碑

新作睢寧縣城碑

有題後

敕賜旌忠祠碑

代李師作

記

敕修琉璃河橋記

寧波府新建海曙樓記

重修鄞縣儒學記

新開寶應弘濟河記

寧波重修大石礮記

天井山龍王祠記

寧波佑聖觀繕修記

董孝子廟新修記

敕賜于忠肅公忠節祠堂記

王氏義庄記

代殷師作

游泰山記

重修延慶寺記

重修石塘二碑記

喙鳴文集卷五

四明 沈一貫肩吾 著

碑

新作睢寧縣城碑 有題後

睢寧直淮安治西南二百里而近與徐僮取慮隣
風氣伉健往往多陸梁干紀之夫楚漢間夾睢水
而陣唐扼睢陽宋戰符離皆近郊也邑故有城庫
陋比者河水濫囓臯陸則郭郭皆復于隍無復廻
繚居民益蕩蕩靡保蓋三十餘年矣而未之嘗問

莫大夫秉憲淮徐望而喟曰是邑也而無城哉乃
與其令申子議申子曰念之熟矣邑幸多決潁饒
芟茅可刈而陶近山之石可燔而灰第無所得食
耳公慨然曰吾事也乃以贖鍰二百金資更請
開府尚書大中丞太倉凌公巡按侍御貴溪姚公
聽發廩粟千石以鋪役者於是令喜身踴躍董勸
緩他役簡他費日持籌而會之畚鍤具興甃堅椎
實雉堞櫛起樓櫓四立皆密緻堅善可貽永世自
萬曆十一年春經始彌歲而成不妨農收不呼閭

左寂然無聲而部使者再來已巖立于市外矣于是睢之室家保聚安枕無盜賊憂而令以為微莫大夫不至此宜勒金石以示方來夫設險守國易固著之城漕城韓風人詠焉而春秋每城必書城宜重矣不曰宗子維城則人尤重莫大夫從淮徐以來飭起惕積千里之間桴鼓不驚矻矻乎所謂南國干城者非耶今之睢異乎昔之睢南衛陵寢東翼漕渠城堅奚啻一方之利即國家萬有一分之墉德必將藉之海內之安瀾也猶逆折攘偷肅

清郊虞以無憂其父老子弟何不懷之敢萌令圖
茂業可無識乎公名與齊廣以西馬平人辛未進
士由倉部郎守東昌為今官勞績多茲不載載其
逮睢民者如此申子名其學為不佞門下士始受
業時目不忤視齒不苟見嚮焉如無為而積六安
判至今官以廉平數奏最蓋內約外勤捐私壹意
公之効也其籍山東日照人

申子可謂近世循吏矣余與涇陽李公同官吏
部嘗問李公申子一貢流而每薦必及雖公總

督淮揚亦薦之豈有異哉李且道且歎姑無暇
他論獨論其為城事一日申子言於開府欲為
城開府姑應之未決無何開府經其縣半就矣
驚曰安得金錢而為之對曰不費官亦不煩民
開府曰何對曰令來時邑故多沮洳茭槁也而
務閑無事輿廝徒飽食坐卧令惜日課之樵爨
之茭槁山積無所用用之陶得甃以鉅萬計度
為城有餘獨少灰與工食今賣茭及甃就矣開
府歎息助以米碩千再過之樓櫓具備蓋所得

於上者獨莫少叅鍰二百與中丞米千而人不
知所以成也嗟吏若此於天下何有抑申子不
獨城初為六安州判官水使者檄築高堰亟成
常留治河不之州無何天官擢為他縣令當去
而水中丞特請改為睢寧睢寧地久蕪莫耕所
以然者耕則吏輩而求積逋焉故莫耕申子捐
其逋為履畝賦三年境中土無不耒耜者則又
為之立義庄身騎馬詣勸之淮徐流民以睢寧
為歸故每薦必及五年得二十餘薦云後來朝

以母老欲解綬余留之擢澤州守此記當余未
問李公時作今讀之不飾辭顧申子歸功於莫
少叅者何豈其受特知邪不可知矣

勅賜旌忠祠碑

代石麓師

隆慶二年御史臣杰言所部保定府故太常少卿
楊繼盛鄉也其吏民為臣請立祠哀死勸生以詔
永禋禮部言上從之賜祠曰旌忠於是保定守
淇閼故牘有前都御史某葬公羨金如干四倍之
卜地城西庀材鳩工埏埴繩鋸立三楹以居公而

兩亭其傍刻公所為二疏者翼廡重門甃而環之
軒軒肅肅道路流涕於是鑱石為碑以辭屬余碑
曰公諱繼盛字仲芳少時家貧為其兄飯牛云然
性嗜學不辭拮据以就其業丁未舉進士授南吏
部主事地閒務簡以其餘力問典章於鄭公曉論
樂于韓公邦奇講聖賢之學於諸大儒先生已遷
兵部員外郎當是時虜薄京師方得氣去而咸寧
侯鸞驟貴用事柄兵政欲與虜通馬市外為羈虜
而內固權公抗疏論其不可者五大指謂馬市者

和議之別名非國家所以自完而警狡虜之道也
必且廢邊防深敵師損國威不可善後說甚具而
逆於鸞下公詔獄貶狄道典史無何鸞誅上即
貶所起南戶部主事三日遷刑部員外郎改兵部
郎當是時蓋分宜誼公而惡鸞引公之重以自為
云公聞之笑曰去一鸞復就一鸞天下有烈士丈
夫為亂人用者邪且天下苦嵩久矣毋使滋禍即
疏嵩大罪十而陛下所為不知者以嵩有大奸五
其道貞其行獨其氣奮其詞參覈而不浮剴切而

詳白累累數萬言幾感悟主上以為非二王莫能
明也凡人莫不嚮其所榮而思其所知就其所便
而不復其所苦公起顛顛還中朝分宜方自為功
而裁以大義歸身朝廷糜爛箠挺慘於鋸鑿創痍
未合而料編之章再上非質忠性義而不可散於
中者邪公䟽而用海內即衽席之安朝廷晏如也
而是時也分宜能移主上心問引二王何為復下
詔獄杖至百論死居二歲乙卯十月朔竟斬西市
又七歲而分宜免不得良死又五歲今 皇帝奉

遺詔贈太常少卿錄其子太學生謚忠愍於是乎
祠悲夫休哉夫公所以報主上與主上之報公者
交厚人臣祿於朝頂踵皆主恩也故不以君之識
不識而死節官下所以報非求報也故曰公厚然
論定於久而賞溢乎制亦不問事之成不成而報
忠優於報功故曰主上厚人謂先皇帝神鞠寔
誅兩戮大愍不爽而公不幸先其禍痛憤何極然
不痛憤又何以章忠臣之節與先皇帝今上咨
嗟崇獎至意哉故世必有大痛而後大快之斯公

之所為垂譽長久也所為祠者本發于二疏余表
公大節而略其他為辭以侑神辭曰流旭兮旦開
照靈旂兮驅昏霾輪迴焱兮右黔雷團元氣兮惠
來帝嘉女兮怛女撫女壯兮下土彎天弓兮殪
天狼血含光兮注牙幢載逢千兮與俱行檻宿莽
兮瀟湘閹浮雲兮將暮蕢菜施兮紛莽莽山中閭
兮鬼殺我鬼殺我兮我有主皇天無私阿兮女余
輔青虬兮白螭雲中兮遨嬉厲余齟兮上谷滌余
腸兮桑乾湄珠宮兮翬翬寶璐兮枚枚靈來兮不

來不來兮心悲變為牲兮罔兩脯鱸挈貳兮雩為
俎彭咸參兮萇弘伍靈番番兮肅然而來下為民
正兮終古羗焉窮兮社而稷女

記

敕修琉璃河橋記

國家奠鼎燕京控北戒河山之勝西來諸水蜿蜒
而注于南縈迴若帶然去都城三十里為蘆溝河
有橋又南七十里為琉璃河古聖水也源出房山
龍泉峪澗壑斗絕受胡良挾河諸流而東匯于拒

馬霖潦時集迸湧奔潰瀰漫殆百餘里矣為朝宗
孔道而河當其衝故未有橋也蓋不勝濡軌之慮
焉 肅皇帝已亥狩郢中始出水衡金錢累石梁
七載而成又隄其兩壩各五百丈車馳馬驟如行
康莊 肅皇帝不自有其功而榜曰玄恩咸濟謂
若天錫云頃年以來橋南洞圯者三隄有泐有圻
道中絕人迂折亂流渡 上聞而憫發內帑重修
而 聖母慈聖宣文明肅貞壽端獻皇太后益出
宮中委佐之勅內官監太監何江工部郎中胡瓚

往肇庚子冬越壬寅春而告訖圮者繕而加固泐
者拆者甃而加完又于橋之北創神祠祠前為井
濟行道之渴費金錢若干而皆自御府世且永賴
官若民不聞也茲役也續先之緒不佚其光臣謂
曰孝軫民之涉不廢其政臣謂曰仁規利之鉅不
啻于費臣曰訐謨權事之急不詘于時臣曰遠猶
跡微而德博事小而功大 皇上之所以繩武而
錫類者可窺萬一矣夫天下事皆有自來莫不積
疇成敝積敝成壞壞極而更乃煩費已語有之千

丈之隄潰於螻蟻萬木之林焚于鑽燧積漸然也
當橋初罅時令有司善為之不過一石一簣之勞
何至煩費哉唯忽于一石一簣而幾毀成緒以厯
聖天子之經營故行隄者塞其穴慎火者塗其隙
保治者防其微嗚呼豈獨橋然乎哉 上命臣一
貫作記臣恭紀歲月以宣揚 休德而垂之來茲
復申積微之說願後人無忘斯功也謹記

寧波新建海曙樓記

門上為樓以望曰譙都之有譙中四軍而建牙控

嚴城經略戎事賓朝諸岳徵號四境故有挈壺
漏刻晷揆景嚴啟閉警作息之事寧波亦東南
大都會也障百谷之下右馳甌越交廣月蝓無
以之壚左抗吳會青徐日域不賓之國海道通遠
留舶鱗聚蓋戶牖咽喉之地德則象胥不德則戈
矛矣古有一軍制之在宋曰奉國而樓其南如軍
名額曰明遠亦取譙義羯胡之衰爰有大醜據我
天厭其德樓用從火明興以來守者未遑暇於茲
事宣德間侯黃永始克建稱四明偉觀夫既樓于

泰寧之日矣。宜觀哉。萬曆乙酉。又火。越明年。為我
蔡侯之四年。而復改稱海曙樓。邦人士雄是役。而
樂觀厥成也。謂不可以無碑。曰。樓之來。父老掌故
之傳。略金石湮滅。文字眇聞。沈子無讓矣。樓直衛
南。蓋今之衛宋之軍。而府于衛之左。樓居西南。衛
孱侯也。城郭溝池之任。在府境中。人聚府而請之。
其父老曰。無以抗形。示嚴攬。蘊風氣。其博士弟子
曰。無以察象。下漏為作息。准忘樓之為麗譙也。蔡
侯及其僚議曰。役鉅矣。不可以煩民。有一焉。定海。

新權關關入所以資開府也而開府晏然資幸有
餘可請乎於是請以八百金集工以廩廩之餘佐
故址為兩觀而梁其中則改甃而屬之樓為間五
前為複宇左右為翼方各有露臺巨棟肥楹丹雘
粉堊地聳勢峻干霄而上門開牖洞沆瀣茹吐高
如其址址高二丈有八南北廣五丈有四東西不
盈三倍者丈自肇度底告成十閱月而民不知也
沈子曰樓之稱海曙也善哉明受天命阨陬僻隅
咸之乎光明窮溟渤所至浮天鑿空而來矧是東

夏朝夕之池衿帶之國長安之日在驤首上者哉
而自壬子來鯨鯢蹈揚使我震盪則樓實為我府
肅皇震怒爰整大旅然後兩儀剖清濁分民乃築
室返耕又廿年而始有今日德厚而慈洽法明而
政平吏吾土者大氏惠和潔廉憂勞吾小民故民
如矇之始睹偃之始轉日之新出于扶桑湯谷間
也而是樓以成願自今官我者永懷明德除我豐
鄙守窳之憂則樓乃尊安熹皞無幢節貔武之擾
東向巨浸長耀其華丹是所為名海曙哉預是

役者自開府持議以至於督繩咸有功不可泯具
載于碑陰

重修鄞縣儒學記

古之學多矣率電起而熒滅獨夫子不廢豈人力
哉黃軒以前神嘗雜矣堯舜起而息戰國以來
揚墨又橫行矣孟子起而息晉唐而後佛老滋蔓
延矣有宋諸儒起而息或挽之或推之皆承衛夫
子彼百家靡不相夫子而卒夫子仲尼此以明仲
尼大矣百家獨釋氏久廼單極不能與儒抗斯

明皇帝表章力哉庠序徧天下廩餼諸生群師儒而教之郡邑長為之帥董以風紀之臣三載而賓興鱗比而造天子之庭非此塗者不得為顯秩彬彬盛固宜雖然繇此而盛為利祿奔走非以性起即班班皆濂洛關閩吾猶謂之衰而况白票字獵膚見耳入設難而覆之口張不能射尚謂有儒乎蘄其戴仁抱義興先王之行于世難矣哉天下無釋耳有釋儒將折而走何者師友之教不先而儒無以為家也何以明之今拾釋之吐餘猶傾然

心動捨其家珍而途之求曷不曰歸而求之有餘
師嗟乎敝矣猶然戴峨攝博琅倉曳翁而游取青
紫明庭之上豈不羞先聖辱明主哉世之齒儒
者以賓興為差吾鄞之先稱多儒今益少周侯來
思起其故而新學宮以不佞亦鄞儒也屬之碑學
宮之旁故佛廬先民取之釋以歸儒也侯猶隘之
益市民舍如干楹乃經乃營堊采廟堂更作鄉賢
名宦祠復祠文昌齋廡邸舍咸次有方士游其中
恢然意廣也不佞願與諸君子約曰聖朝之所為

貴孔氏者扶綱常立人紀也無為貴詭矣諸君其
講肄於斯而服習於閨閫庭闈里巷之間人與父
母無間言乃異儒於百家而無負聖朝表章儲育
之意與侯今日之心周侯楚之湘潭人名之基癸
未進士贊其役者某某咸書以觀將來

新開寶應弘濟河記

淮揚之間有巨浸焉受天長盱眙諸水離而稱之
曰邵伯高郵寶應湖云邵伯故無梗高郵有白康
敏越河在獨寶應謂之汜光直黃蕩口黃蕩口居

湖中心相距百餘里勢既浹加為西風之衝槐
角樓一堤如箕如縷不能獨拒守吏常告憊矣方
波忽濤罷鼓不時三老長年望雲測景而後行如
遭其平揚帆若無偶逢其怒棄柁棹如葉耳蓋陽
侯之欲無厭而魚鱉數飽如壬午秋並岍巫招者
纍纍不可計也故計漕莫如寶應急且湖以東田
無慮百萬頃決輒為沮洳興鹽諸邑之萍可食乎
故計湖以東亦莫如寶應急水部郎中許應達任
夫也是倡越河議中格不行涇陽李公來督許郎

理前語李公曰吾聞是役之不可已也顧無煩主計李公朝鳳陽遭鹺使者而問焉吾欲堤寶應而假資於君君鹺鍰今十六萬能捐其半相助乎鹺使者曰均公也胡為不可於是李公更請資於留儲再徃復亦報可廼與部使者偕言上而陳給事者通州人也習知其鄉水利害為上縷縷分別之大司空覆請得俞將筮日鳩工而李公以留司馬遷黃岡王公來載咨載程矢諸大夫宣力不勸自三官廟抵南郭外延袤三十六里而三分

其工許郎暨海防叅政舒君大猷董其北中河郎
中陳君瑛徐州兵備副使莫君與齊董其中理刑
主事羅君用敬漕儲叅政馮君敏功董其南即舊
堤為西而別堤其東杵薪累石實以剛土樹以榆
柳廣可行駟馬引水注之舟行其中兩堤又皆築
滾水壩三以時疏洩水暴長則越河注支河道射
陽廣洋而入海殺其太過無令留害始卒八月亟
成而堅費醵餒暨南司農金各十萬而會稽纖悉
贏二萬餘儉矣河成而舟銜艦至若行溝涂昔之

惕號辟易者謗許以嬉又微寧漕堤以東皆舍塞
茭為索絢以業所謂百萬頃者田長老言徃不獨
苦澇亦苦旱重堤而不敢泄一沟也今食蓄洩之
利盡上上壤矣告成 上甚嘉悅賜河名曰弘濟
爵賞有差予惟縣官以漕為命自嘉隆來歲歲言
治漕汶濟淮泗河海畚鍤具徧而乃稍息肩蓋水
性不可知嘗識之而嘗作之利不無而害時有故
旦言其便夕告棄也舉大事決謀難矣謀決矣取
資又難資具矣重臣數易在職者遽廬目前任事

則又難今費省而利弘人不勞而効捷是策臣之
計定而廟堂之聽審矣諸大夫又家視國私視公
駢工協勞如手足耳目之相為力而無二顧謂盛
朝之纓紼非邪故版築如雲無輕蟻累尺水橫流
長堤不守遠猶如石必有同心一夫疑貳群策不
發夫使慮海內者盡諸大夫也何績不成是宜書
李公名世達王公名廷瞻典留儲者魏公名學曾
驍使者蔡公名時鼎部使者馬公名允登給事陳
公名大科大司空楊公名兆諸具碑陰

寧波重修大石碕記

鄞邑倚于郡其境中分于江江西田仰溉于它山
桃源之泉泉從四明山來最遠故多腴江東田仰
溉于橫溪錢湖小白諸泉從金峨福泉太白山來
源近故多瘠入夏半月不雨農病矣雨三日不休
復澇畜洩之時惟藉人力哉三面濱江醞為水門
以碑名者十餘而最著為雲龍為烏豐為五鄉雲
龍南洩烏豐西洩皆入江而五鄉東洩入小港達
海最捷波流靡不能為澇故烏豐亦嘗前廢不修

自定海人別磳東岡于五鄉五十里外環游淳澮
雍不時下淫霖適來簸為巨浸人享其利吾不能
無蒙其害至萬曆甲午亟矣民乃相率言于郡縣
而奮錙揚鏹排烏豐之隄曰江東大石者而洩之
土始獲平江東大石者烏豐之第三第四磳也磳
有五此居其要宋淳熙間守陳公塏治之堙今嘉
靖間守周公希哲曾公鑑又治之復堙江東介民
居中跡宛宛在顧疔歲沮洳水不行䟽之行矣大
石在演武塲中地曠力易施而渠隄石阨又止一

洞泰瀕江潮易咽于是守吳公安國與令翁君憲
祥採余之言而爰視爰相經始其事白之海憲吳
公鴻洙而新之徙基去江千十餘丈倍其洞為三
密築以松鉅石鈎連而甃之梁亘其中空以防盜
舟之決橋于其旁便人往來濬河倍寬之為五丈
者百有二十丈俾潦有游又慮閑啟宜置守置守
宜有以食之賦諸民非久計則視演武塲多商地
而建菴如干楹召僧居之履二十畝不稅以給俾
蔬茹于其間且當兩硯捷費菴以硯設名曰永利

利所沾槩由起甬東一都至三十都凡三十七萬
畝不欲多徵畝取釐銀以兩計者厯四百而太守
獨助俸二十令君半之時疏臯人執役不浮浪一
錢故善而亟自海憲太守令君外為倅馬君復淳
判施君朝恩歐陽君燦而司理張君似渠嘗署邑
勞居多既張公佐治來代守下車以來輒問增其
所未周徐君大紳代倅王君明鰲代判劉君國縉
代理並裨厥成董役則尉王秉禮耆民戴俊僧能
慧余惟水者天下之大利害也過之與不及之皆

害嚮東岡之未礪也人皆言東岡利比礪之又言東岡害有所以除其害而後其利全既三倍大石之洞則烏豐之他湮可無問其利又全此雖一役而計水之平已審蓋時當泰寧諸賢輳合以劭農振業為惠以協心毗德為恭痼瘕急人委悉心計舉不再籌任不岐指不煩一胥牒不聳一里旅功告成已而民莫識所由來可記以為法尚冀後之人之眎此也無廢厥初焉

天井山龍王祠記

郡西南山穹隆若天下者四明也四明之麓蓋四達而趨東北者勝是為郡治方道半曰天井神龍宮于其間井有五近人者三可跡而禱祈其二則栖蘄巖與天隣矣其應祈澤槁往往著靈異遠不可知信之故牒而嚴祠之自唐來已聞入國家載在祀典歲遣有司致祭云其後有司少懈或使廣文攝既又假民冠帶而攝今年海內大侵斗米銀二錢六月既望復當麗牲之日而郡二龍公視縣事歎享之不誠民亡以賴也自往酹焉明日祠銅

盆浦又明日祠金沙徧龍之所在郡人謂之快舉
秋七月旱先是五月旱是為重氛民嗷嗷罔旦夕
矣郡侯張公暨龍公與楊公黎公唐公皆跣足而
走望為壇壝召諸神焦然稽首張公復以繁露從
事而身求龍于慈谿龍公再來是山捫蘿上第五
井百稽而延佇之有蛇躍入盎中絳紗幕以歸中
道視之蛙在其傍而蛇啖之衆譴曰龍得魃矣越
三日雨明日雨又明日大雨蛇飛中庭而去年遂
大穰民用乂安初侯之禱祠下也曰雨當為神新

宮而更貌之至是乃命僧德基奉所施錢鳩工既翼既煥而請沈子志之嗟夫龍之神自古聞矣而具顯於吾土又具顯于今侯之祈雖民私求于龍者亦甚衆而龍應祈又甚異徃徃晝晦分晷而雨之不越香水一步或嘲龍不太別白乎夫龍蓋有謂也帝方屯膏未得請不敢越命然不無軫于民之荼則姑聽其虔者而私潤之不辭煦煦名此龍之至仁也易曰見龍在田其是之謂乎至于芳馨潔蠲精誠上熏九關為開山川播施則騰躍雲衢

而浸漬下土此龍之大行而志得也然則待禱而
出使人神之以為名蓋非龍之欲哉在九五曰大
人與天地合其德則龍德之盛矣吾病世之尊龍
者忘其十雨五風之力而區區于暎霍一杯以為
功故表之若此使瞻者無期而不肅然張公文奇
蘇之長洲人龍公德孚楚之武陵人楊公汝浚楚
之彭城人黎公可耕粵之陸川人唐公世堯粵之
平樂人楊公黎公時為別駕唐公為司理

寧波佑聖觀繕修記

佑聖觀在寧城乾隅殿祀玄帝而閣其後祀玉皇
始元至治間稱道院我明市舶太監梁瑄葺之改
今名嘉隆間住持周元理里人方惠迥等將修之
而余太保柴方伯諾焉中書舍人廷椿太保仲子
而方伯壻也首捐金三百道士周茂齡善符水工
醫術有私田鬻之得金二百周之徒王守純合善
信所施而經營之自癸至于辛始落成亦勤矣哉
金山人鍰來謁余為之記余惟佑聖世所稱真武
者也月令孟冬之月其帝顓頊黑精之君其神玄

冥水官之臣其蟲介龜其候雉入大水為蜃蜃者
蛟屬也雉者蛇化也故始設教者援神而立之象
載記稱北方七宿惟龜與蛇又或謂北方神獸龜
與蛇交而莊子稱禺強之神立乎北海疏言禺強
人面鳥身珥兩青蛇踐兩赤蛇靈龜為之使蓋蛇
為火龜為水蛇制龜龜制蛇實應坎離相媾之義
操子午之衡而天一為之本宜為養生家之祖道
書往往稱之我 成祖及 肅皇之世表武當為
太嶽玄嶽而臣視五山獨尊饗之歲時奔走天下

則我郡十萬家人民之香燈于是也固宜矣夫正
神者不為小怪司大靈嚮不幽而最幽者也今
昭明發揚白日行天與黜谷闇室玄之又玄者孰
非正神也哉而人之事神必自玄始玄則真真則
武黃庭經謂毫髮節理皆有神誰能不欺毫髮節
理者乎若世之傳真武者吾不能考其自來要之
至理豈異于是吾用是以告來者

董孝子廟新修記

寧波府治南六十步有漢董孝子廟孝子諱黯字

叔達江都相六世孫鄴人也少孤獨與母俱百順
咸聚鄰人王寄者富而無行董母與王母相見各
言其子而寄病之毆董母孝子歸而母方蒙被卧
孝子跪請罪母曰無他我失言致寄辱也因不起
孝子哀毀畢塋終不言王母卒且塋手刃寄以祭
而自詣官請死事聞和帝釋弗誅加旌焉又辟為
郎中不就卒初孝子母嗜大隱溪水孝子以遠不
能致徙居之後人以慈名溪以溪名縣而在鄴者
即故居祠之唐大曆間刺史崔殷修自為記其母

像在南郊草堂中宋祥符間錢億迎歸於廟而請
於朝賜孝子號純德徵君建炎初令林叔豹慶元
間令朱堂咸修其廟我洪武初勅封為董孝子
之神命有司歲以六月六日致祭用特牲正統二
年守鄭珞修其廟國子祭酒陳敬宗為記今萬曆
間守蔡公貴易謂神母處殿偏非禮謀于鄞令周
君之基斥鋸買隣地而節推張君似渠捐俸任之
其後海憲丁公此呂吳公鴻洙守吳公安國倅黃
君鍾會別駕施君朝恩令華君士標翁君憲祥相

繼成焉一貫為記記曰昔之祀典嘗濫矣明興
高皇帝秩正百神于吾郡獨祠孝子夫孝常德也
循陔戀闈無他異則莫駭而傳孝子之傳以殺寄
異也曷異焉偉孝子之處寄母善也吾有母人亦
有母快吾母而不顧人之母錫類推恩道不如是
隱忍以葬人之母而甘心焉然則寄母固孝子養
而孝子葬此所為孝子重者也然未足以旣孝子
報讎之說禮著之節俠名之而王者不載於令急
私忿而藐其公則下無王曲憐人而置不問則上

無王皆瑕德也。毆人至死，法應死。寄之當辟也。久矣。第不檢，不可坐而檢。非吾忍。於是有司必以疑輕而吾終有不報之冤。寧以身易寄死。母煩有司非輕其上，以為不能為吾報，不可以報祁之上也。然則孝子何獨善處寄母？尤善處法。其赦我也可。生其祀我也可。饗蓋余少而豔孝子事，索之漢史。無有時，則妄以為漢如孝子者多，而史不暇收。既讀張敏傳，而悟其繇。當是時，有人侮辱人父者，其子殺之。朝廷賞其死，因定其議，以為輕侮法而敏。

駁之以為開私殺路除其令必以是格孝子不傳
不知寄有死罪不止於侮辱孝子殺死罪人與殺
侮辱者異非不顧聽之有司而勢不可不為私殺
孝不忘君正足傳也和帝方用敏議而於孝子宥
且徵無頗刑無濫賞矣余恐後之人有孝子之心
而失其中行輕殺人以快其私而卒不免于吏議
則謂孝子事不可法否則謂後世無漢吏之厚而
不咎其講之不精也故闡之

勅賜于忠肅公忠節祠堂記

我已已之難少保于公有社稷功而不獲死海內
悲之 純皇帝始白公寃 敬皇帝贈特進光祿
大夫柱國太傅謚肅愍春秋祠杭州逮我 皇上
又謂肅愍未足以稱改謚忠肅乃公之鄉後進太
常少卿鍾化民輩乞祠之京師詔可賜祠名忠節
嗟嗟恩綸載嘉而一則曰忠一則曰忠此以表臣
鵠矣夫臣事君以忠童子能誦之而名公巨卿不
能者何人臣之忠宜忠其大者不宜忠其小者患
在識淺機闇莫適主持利害死生休于冒浮議在

前禍媒在後自非性貞義不二心孰能忠其大乎
方是時六飛蒙塵九廟震驚見為遷者十九公
則以為我鑒不遠在靖康之世而以一少司馬主
擁立議卒排盈庭奠人心此為國不為身忠之大
大在定國是及虜以得君嘗我陽為講而陰恫惴
為舊君則忠為新君則忠公則以為社稷重君為
輕有宋公子目夷事在南渡安足法謝虜曰賴
宗廟之靈國有主矣虜知挾空質無益自引去此
為國不為君忠之大大在堅國謀既而我算勝虜

計迫讒人在傍不兩立之形已見公于是乎以戰
為守以守為媾以不迎迎以不取取卒使乘輿還
歸日月復明君與國兩無恙忠之大大在復君而
定國然定國公志也復君會也直顧國何耳安知
君不知君安知身何待箕口簸揚而曰不免哉故
雖國安君還而志死得死自其分耳抑又何憾人
亦何駭之有若志死而生則公之幸而人不能必
於天者也人臣任國必無兩適而皆可之地為國
國耳為身身耳惟忠臣為能深謀國淺計身功不

祁顯就心不祁衆白豈無繆巧鄙不屑為故力顯而慮周誠合而就多君子曰裕陵即不還公猶為忠公即不死其烈猶在人特為裕陵還而加功為公死而加哀非忠其死也凡憫死與嘉忠異死而未為忠者多矣死豈忠耶予又怪世人好苛論而引鉅南宮易東宮兩事謂公不能強諍信以為責脩賢者春秋意耶苟南宮之憾不可釋則裕陵必銜之曷為曰謙忠臣享輩殺之非朕意苟東宮之憾不可釋則茂陵必銜之曷為復其官

優其家遣人致祠固兩聖人之盛德哉亦公精忠大節與天日昭不斲然而然也夫以兩聖人之心曾不芥帶而萬世之史評定誰為此者亦多言哉予因祠而及之為忠者勸焉

王氏義庄記

代殷棠川師作

太倉王氏本崑山人已割崑山支地屬太倉稱太倉王氏王氏父子兩少司馬前少司馬倬自南都歸也謂其子都事愔曰幸食先人餘如宗人何吾視宗人有逖昵自先機宜即崑山我也寧崑山哉

自司諫分水我也自即立始興瑯琊江東我也吾
敢私先人食而坐視先人子借令朝夕糊餽粥不
給雖夙夜必祀先人忍向隅而愀然我邪然吾計
之二疏即多金一朝散予盡無留惠矣孰若蘇州
義庄都事度父意始捐千畝為義庄庄之約曰人
歲予米升如日之數疏者二三娶者嫁者病者葬
者火盜者有差無夫不嫁者倍之行之四十年而
田益瘠出實不半則後少司馬忤起矣後司馬出
入戎行不暇經紀其事且令歲捐米三百石為助

竟伏法於是呼二子世貞世懋可簡去瘠确益以膏腴為子孫百世計毋使人謂先澤涸九里不得潤二子歸視其瘠三百畝歸都事子而益佐以八百畝不易之地總千五百畝更創庄廣若干畝綽楔其前曰瑯琊義庄祠曰王氏先德中祠即丘始興左偏司諫右偏機宜顏之曰尊始即丘者覽也瑯琊始始興者導也江左始司諫者縉也分水始機宜者文也崑山始後為堂五楹曰錫胤祠兩司馬及都事為義庄始歲召族人祠春秋臨之以尊

而懲勸焉已而燕敦睦也祠左為義學以業王氏子弟給筆札酒食試補勸駕之費右為義倉蓋藏而弊出入皆畫自二君子也殷子曰義庄范氏前未聞也其昉合族之義耶夫繫之以姓而弗別綴之以食而不殊至於賙賻承含皆有正焉先王之制禮也親以飲食始也夫務合族以為勸則念其所以為家矣視人之饑猶已饑之而况親骨肉之愛乎請循其本今以兩稚子爭搏黍慈母不特梓並私之也故昆弟之所分父母之所兼也子孫之

所分祖宗之所無也其涉彌遠其無彌博九兼而
九族睦百無而百代通矣今之雄大官享重祿委
長物於私橐內子孫而外昆弟勃蹊諄語以為常
者何限不知過而問者必曰某某之宗人也其大
夫之胤也安在其為亢宗稱顯揚乎司馬公蓋不
忍念姁姁相哺非久計規長畫貽永澤四君子又
引而濬之世德相尋可不謂希焉夫范相繼武姑
蘇流聲王氏亦然三嬪五賢古今大義諒茲一揆
矣

游泰山記

泰山古稱東岳與泰丘異書謂為蓬玄三宮空洞
之天其神天齊王領仙官仙女九萬人天帝之孫
主人官職生死貴賤有神房阿閣金床玉几云前
代之封至泰山天齊仁聖帝而本朝直稱東嶽之
神正名矣然流俗黷祀亦聽民趨不禁大抵多因
仍前代不知所起廟在泰安州城中廟自有城高
二丈週三里為門八而南闢者五正中曰嶽廟門
東偏曰仰高西偏曰見大東闢曰東華西闢曰西

華後闢曰後宰門各有樓而角樓亦四曰巽艮乾坤由岱廟門而入為兩重門殿曰仁安左右鍾鼓樓樓後為齋房殿後為寢宮宮左右為配寢皆宏侈如王者重門左為三靈祠右為太尉祠祠前別殿曰炳靈曰延禧廟中古松數十蟠結如蓋而炳靈漢栢延禧唐槐特異廟前有亭曰遙叅前為門重簷四面十六角有元君像焉禮頂廟者先此故曰遙叅泰山之尊神嶽帝也而其奔走天下香火不絕以元君故元君廟曰靈應宮在嶽絕頂本昭

真觀而本朝 肅皇帝遣工部郎陳策齎萬金益
治之部使者時有增彌鉅麗矣神曰天仙玉女碧
霞元君世稱東嶽女而楚高誨以為非東嶽女蓋
嶽頂故有玉女池池側有玉女石像祥符間詔浚
其泉易像以玉石祠之來已久唐劉禹錫送東嶽
張鍊師詩有久事元君住紫微之句可徵也李諤
瑤池記謂黃帝建岱嶽觀遣七女雲冠羽衣以迎
崑崙真人玉女蓋七女之一其說如此四方禱祠
無乏九月至于四月尤盛縣官因筦轄之謂之香

稅亦不知所起香客來人具銀八分報名于遙叅
亭委官給單從山後來者玄武門委官給單皆持
至碧霞宮委官驗放香客謁碧霞宮有施以大柵
開宮門而聽其自捐無定數每夏冬濟南府會官
啟柵金銀珠寶玉石首飾館娃銅錢與香稅並輸
藩司旛蓋袍服紗羅諸幣輸濟南府金錢以待有
司公費及德魯衡三府郡王之祿幣物以充三司
及運司濟南府官屬折俸嘉靖三十七年後輸太
倉二萬有奇猶不乏山東國家左輔地大農諸賦

後獨先而藉此以佐六郡之急云其登陟之艱應
劭謂中觀留馬仰望天關如從谷底觀抗峰高如
浮雲峻如無道徑遙望其人如行朽兀或為白石
或如雪久之白者移過樹乃知人也賴其羊腸逶
迤兩從者扶掖前後相牽後人見前人履底前人
見後人頂如畫重累人初十餘步一休稍疲咽脣
焦五六步一休牒牒遽頓地不避燥溼前有燥地
自視而兩脚不通其險如此今登陟即勞何至如
劭所云達官貴人老夫稚子筭黛者流可輿而往

還何向者之險而今夷也則椎險為平甃危為安
拾級而上如梯或左右絙索以輔困憊沿塗賣漿
不乏飲啗如此安得困也余謂此皆元君力何則
宋以前泰山為天子封禪地緇人羽流不敢據而
有嶄業未彫行固難也我自 文皇帝却封禪以
來人絕望幸故泰嶽之權寄於玉女而天子封禪
地共于齊民民各得以其意歲脩而月治之如萬
流之赴大壑雖有龍門底柱安得長雄其阻險乎
故曰玉女之功亦國家不污七十二君編錄之效

也予之往亦輿至險絕竒勝未嘗不步步不能數十武即僊劬所謂後人見前人履底者時有山雖開險體自在又上山可輿下山不可輿如收駿馬于絕坂繫駛艇于夔峽也豈易哉漢官儀曰盤道屈曲而上凡五十餘盤經小天門大天門自下至古封禪處凡四十里或云四十八里三百步余謂土人以盡一級為一盤盤復一平約大盤三十中盤倍是小盤又倍是大盤二三十級中盤十級以上小盤十級以下級七寸以此計之泰山可直高

二百丈蛇行屈曲而上可二十餘里顧其難雖四十里無以易矣或言高四千丈者以里計邪予始至公署公署負泰山入門如在其屋上者心易之乃登而知其遠方半山見頂出雲到天門即霏霏霧已屑屑四面雨集一步不可前稍霽強扶而上則剛風霍霍遶時四月十三日寒威大振挾重綿不得溫至夜又雨不休予自嘲曰吾昨易山靈山靈報我如秦時故事又嗟天上清虛廣寒如此凡骨不可住翌昧爽館人請觀日凌風躋日觀觀之

予嘗從招寶山觀日謂泰山當不過是乃頗異焉
招寶去海水近平視日出泰山高俯瞰在海底如
曰天末皆有涯獨寅卯方為大海無涯闕地而躡
朱輪閃閃山顛已辨色而下土猶昏昏也然日行
駛彈指而大地辨矣昔人謂為鷄鳴為夜半亦甚
其言哉日始出時觀有三點若樹然者在輪中過
半規輒都滅不知其何以也碑最古者為李斯銘
歐陽公止得其四十八字而劉氏以為親到泰山
審觀石三面皆有字總二十二行行十二字字從

西南起以北轉南南面七行其未有制曰可三字
復在西南稜上劉大觀時人今予所見獨南面七
行之半三行臣斯臣去疾御史臣昧死言臣請具
刻詔書金石刻因明白矣臣昧死請此二十八字
亦無制曰可三字在後又為後人所破滅矣無字
碑石理如細玉搏成面濶三尺旁厚二尺許高可
丈五六或言石表者良是謂石函非也磨崖書在
東嶽祠後玄宗公分可觀蘇頲刻為俗子鑿滅而
加以惡札此其人亦欲與桓司馬所謂萬年者俱

久邪山趾有石經峪石坦平一片大三四畝刻金
剛經於其上字八分大如斗蓋唐人所為水發則
沒歲月洗蕩而可讀者猶半蓋竒觀云大都嶽以
高勝其石以巔屹岻嶸勝傲來居其左方如削筭
如棕櫚葉如戈甲千萬捍關雖樵蘇無跡焉從白
雲洞俯視來路如虱緣縫中行表不能丈諸峰樵
徑微白可數如人筋理四布其於州城一蟻聚也
汶水橫帶遠視蒼蒼無辨豈游氣掩余目邪或清
秋勁冬萬里寂歷可遠到吳門匹練間耳海內山

可與比高亦不少顧皆迴歷數十百里蜿蜒以上
漸而遠地獨泰山拔平地為崔嵬以此駭世且山
從崐崙來不知幾萬里而到滄海之涯泰山特起
為嶂於東流如端笏垂紳拱揖而迎來者故中原
之氣收儲祥毓秀生人物之萬殊泰山其天下捍
門乎脉絡之來楊筠松謂從青徐起西遡而上其
水皆會汶入漕東南若泗若沂又皆入漕濬發宣
尼之祥殆非偶故曳杖之歌明自敘矣而道書謂
泰山周迴一百六十里非過或言周三千里或言

一千里或言二千里今觀支分脉注蓋三州半而其東北麓注海者不與焉以予所觀而妄意之泰山蟠環不過三百里而從青徐數之以至於泰山何啻環三千里也余既游將記其風雲物色之異則古今人不少且人各言其感慨欣戚之情近耳何足紀存獨徵其掌故而論之若此俾後之人有考云

重修延慶寺記

四明人好佛多寺院而延慶最大延慶居城東南

偏四周環水而外食金峨它山蜿蜒七八十里之
水始于郭周為保恩院宋興法智師者創之師竒
人也鄞金氏名知禮七歲度於興國寺寶雲師受
天台智者止觀法止則念念息緣觀則真真中的
積年累慧探微窮性吹大法螺擊大法鼓以弘其
教于江南真宗聞之遣使者致問而賜紫號為法
智敕建延慶講寺師以其徒慢弛而不精進也結
十僧禮懺期三年竟焚其身以作人之勤惟時楊
內翰億李都尉遵勗貽書勸止復令李太守夷庚

密護之不獲遂蓋脇不沾席者四十餘年于天聖
六年正月五日跣趺化去焚之得舍利無算身所
授度者凡若干人散于四方趙清獻公為之碑初
師之營此寺也有僧異聞覺圓為左右而作誠誓
具載教行錄中曾太守會來令其子公亮脩謁師
夢相公來而後為魯國宣靖公乃大置田圃安集
其徒此寺所為盛也涉元兵燹惟觀堂巋然在而
四牕無擇兩僧為之興復至我正德嘉靖間僧泰
侈甚惟酒肉是議矣公私交逼產廢物散庭宇有

圯壞而諸像為傾者自余之居日湖也與寺為隣
戒不得擾一物及之京師隆勝圓復來請募脩蓋
余子泰鴻導其徒斷葦茹素興禪禮懺如大師之
初而佛教始振積數年而出諸施以經營煥然巍
然庶幾克備費且踰六百金矣紹居士汪士暎以
記請而二僧尚有餘于心不能已已余謂之曰人
以營道心營事奚而非道以營事心營道奚而非
事舍道則無事無事則無道豈有虛至之功哉今
能精心止觀詮義脩懺捐身策衆感聖孚儒四十

年不協席如大師者乎內心定而鬼神服奚經營糠粃土苴之難且吾聞之以假脩真無假非真吁嗟乎是在踵至真人之所為耳記之以俟方來

重修石塘大小二壩碑記

方國生民藉衛于土厥土用水說在岐伯氏之養榮也吾鄞由甬江而西沃野二百餘里它山據江之上游以注于會城靈源大啟故西南諸鄉亡不藉榮于它山者顧泰雨橫決泰旱焦洩決不甚虞而洩乃助割於是有所保豐諸壩以司蓄瀉石塘介

在西隅眎他碕稍隘而為利滋鉅折而東有小碕
循碕而下為九里浦以注于江高下斗懸皆鄞土
也小碕之內支流蜿蜒有逮于慈者然而碕非慈
有矣碕固有限不以石以木盖創始者酌啟閉之
宜而定規與碕終始夫寧不知石之貞遠也為蓄
易而瀉難利于下流不利于高壤乃處下流者邀
我之啟以為蓄而踞高壤者因彼之蓄以妨瀉俾
得利而漫有害石之不宜于碕也明甚萬曆乙未
小碕崩圯司碕之吏議繩初繇而慈民以其私憶

謂不利于已至鳴于上官前令常熟翁公誠慨斯
事率諸父老繞碣而揆追維往蹟曰吾為疆吏我
民之弗奠惶恤其隣遂報中丞御史臺暨巡海使
者仍用木於是鄆民雷然頌德趨事若子浹二旬
而大小二碣畢事既畢事而鄆之民謂自茲以往
水藏安平雖有旱潦無損于秔稷永有石塘之利
矣夫莫非王土何別于慈顧為慈畝不過數頃為
鄆不獨五隅遍于七鄉鄆之藉以朝夕者大半夫
斷指以存頸仁者不為况斷頸以存指乎宜公之

力捍吾圉而樹淵邈之圖也是役也大義布昭衆
志胥定皇皇明賜與礪俱遠盖公為政敦敏肅給
其為民驅除若疾于厥躬必釋而躋之康阜乃憮
茲特其一事事在丙申之秋明年奉詔充法從諸
父老謀饒諸碣以詔後來徵石言于余時余方待
罪 綸扉不果歲丙午 予告歸里里人相率而
前誦公顯伐遂不辭而為記諸大夫及鄉之慕義
率貲來埤者其氏與名具書